

पतरस रौ पैलौ कागद

1 यीशु मसीह रै प्रेरित पतरस कांनी सूं: परमेसर रा वां टाळ्योडां लोगां रै नांव, जका पुन्तुस, गलातिया, कप्पदुकिया, अशिया अर बिथुनिया रै खेत्रां मांय हर कटेई फैल्योडा है। **2**थाने, जकां नै परम पिता परमेसर रै पूरबलै ग्यान मुजब टाळीज्या है, जका आपरी आतमा रै कारज सूं उणनै समरपित होवै, जकां नै उणरै आग्याकारी होवण सारू अर जिणां माथै यीशु मसीह रै रगत-छिड़काव सूं पवित्र करीजण सारू टाळीज्या है।

थारै माथै परमेसर री किरपा अर सांती घणी सूं घणी बणी रैवै।

सजीव आस

3आपां रै यीशु मसीह रौ परम पिता परमेसर धिन होवै। मर्योडा मांय सूं यीशु मसीह रै पुनरुत्थान रै मार्फत उणरी अपार करुणा मांय अेक सजीव आस पावण सारू वौ आपां नै नूवौ जलम दियौ है। **4**जिणसूं थे थारै सारू सुरग में टाळ'र राख्योडै अजर-अमर निरदोस अविणासी उत्तराधिकार नै हासल कर लेवौ।

5जका विस्वास सूं सुरक्षित है, वाने वौ उद्धार हासल होवै, जकौ समै रै छेहलै छोर माथै प्रगत होवण सारू है। **6**इण सूं थे घणा राजी हौ। हालांके अबै थाने थोडै बगत सारू तरै-तरै री परीक्षावां में पड'र दुखी होवणौ घणौ जरूरी है। **7**ताकि थारौ परख्योडौ विस्वास, जकौ अगन में परख्योडै सोनै सूं ई घणौ अमोलक है, उणनै जद यीशु प्रगत होवैला तद परमेसर सूं सरावणा, महिमा अर आदर मिळै।

8हालांके थे उणनै देख्यौ नीं है, फेरूं ई थे उणसूं प्रेम करौ। अबार थे उणनै देख नीं सकौ हौ, पण फेरूं ई उणमें विस्वास राखौ हौ अर अेक अेडै आणंद सूं भरीज्योडा हौ जकौ नीं कैवणजोग अर महिमावान है। **9**अर थे थारै विस्वास रै परिणाम सरूप आपरी आतमा रौ उद्धार कर रैया हौ।

10इण उद्धार रै विसय में वां नबियां घणी मैणत सूं खोजबीण करी है अर घणी सावचेती रै सागै

टाह लगायौ है, जकां थारै माथै प्रगत होवण वाळी किरपा बाबत पैलां ई भविसवाणी कर दीनी ही। **11**वां नबियां, मसीह री आतमा सूं औ जाण्यौ जकौ मसीह माथै होवण वाळां दुखां नै बतावै हा अर वा महिमा जकी आं दुखां रै पछै प्रगत होवैला। आ आतमा वाने बतावती ही। अै बातां इण दुनियां माथै कद होवैला अर तद इण दुनिया रौ कांई होवैला।

12वाने औ बताईज्यौ हौ कै वां बातां रौ प्रवचन करती बगत वै खुद आपरी सेवा नीं करै हा बल्कै थारी करता हा। वै बातां सुरग सूं भेज्योडी पवित्र आतमा रै मार्फत थाने सुभसंदेस रौ उपदेस देवण वाळां रै मार्फत बताय दी ही। अर वां बातां नै जाणण सारू तौ सुरग रा दूत ई तरसता रैवै।

पवित्र जीवन सारू बुलावौ

13इण वास्तै मनगत सूं सावचेत रैवौ अर खुद माथै आंकस राखौ। उण वरदान माथै पूरौ भरोसौ राखौ जकौ यीशु मसीह रै प्रगत होयां थाने दिरीजैला।

14आग्या मानण वाळा टाबरां रै उनमान उण बगत री बुरी इंछावां मुजब खुद नै मत ढाळौ, जकी थारै मांय तद ही जद थे अग्यानी हा। **15**बल्कै जियां थाने बुलावण वाळौ परमेसर पवित्र है, बियां ई थे भी आपरै हरेक करम मांय पवित्र बणौ। **16**शास्त्र ई इयां इज कैवै: "पवित्र बणौ, क्यूंके म्हें पवित्र हूं।"^a

17अर जे थे, हरेक रै करमां मुजब बिना पखपात न्याय करणिया परमेसर नै 'हे पिता' कैय'र पुकारौ हौ तौ इण परदेसी धरती माथै आपरै रैवास काळ में सन्मान वाळै डर रै सागै जीवौ। **18**थे औ जाणौ हौ कै चांदी कै सोने जैडी चीजां सूं थाने उण बिरथा जीवण सूं छूटकौ नीं मिळ सकै, जकौ थाने थारै बडेरां सूं मिळ्यौ है। **19**बल्कै वौ तौ थाने निरदोस अर कळंक विहूण मेमनै रै उनमान मसीह रै अमोलक रगत सूं इज मिळ सकै है। **20**इण जगत री सिस्टी सूं पैलां इज उणनै टाळ लियौ हौ, पण थां लोगां सारू उणनै आं आखरी दिनां

^a 1:16 उद्धारण लैव्य व्यवस्था 11:44, 45; 19:2; 20:7

मांय प्रगत कर्यौ। 21उण मसीह रे कारण इज थे उण परमेसर में विस्वास करता रेवौ, जकौ उणने मर्योडा मांय सू पाछौ जीवतौ कर दियो अर उणने महिमा बगसी। इण भांत थारी आस अर थारी विस्वास परमेसर में थिर होवै।

22अबै देखौ, जद थे सत्य रौ पाळण करता थकां साचे भाईचारे रे प्रेम नै दरसावण सारू थारी आतमा नै पवित्र करली है तौ पवित्र मन सू आपसरी में प्रेम करण नै थारी लक्ष्य बणाय लेवौ। 23थां नासवांन बीज सू पाछौ जीवण हासल नीं कर्यौ है बल्के औ उण बीज रौ परिणाम है जकौ अमर है। थारी पाछौ जलम परमेसर रे उण सुसंदेस सू होयौ है जकौ सजीव अर अटळ है। 24क्यूके शास्त्र कैवै:

“सगळा प्राणी घास री तरे है,
अर वारी सगळी सज-धज जंगळी फूल री
तरे है।
घास मर जावै
अर फूल झड़ जावै।

25 पण प्रभु रौ सुभसंदेस हमेसा सारू टिक्योडौ रेवै।”
यशायाह 40:6-8

अर औ वौ इज सुभसंदेस है जिणरौ थाने उपदेस दिरीज्यौ है।

जीवतौ भाटौ अर पवित्र प्रजा

2 इण वास्तै सगळी बुरायां, छळ-छद्यां, पाखंड अर बैर-विरोधां अर आपसरी में दोस लगावण सू बच्चा रेवौ। 2नूवै जलम्यै टाबर री भांत सुद्ध आध्यात्मिक दूध सारू लालायित रेवौ जिणसू कै थारी विगसाव अर उद्धार होवै। 3अबै देखौ, थे तौ प्रभु री किरपा रौ सुवाद ले ई लियो है।

4यीशु मसीह रे नैड़ा आवौ। वौ जीवतौ भाटौ है। उणने संसारी लोगां नकार दियो हौ, पण वौ परमेसर सारू घणमोलौ है अर जकौ उणरे ई टाळ्योडौ है। 5थे लोग ई जीवते भाटै री भांत अेक आध्यात्मिक मिंदर रे रूप में चिणीजरैया हौ ताकि अेक अैडै पवित्र याजकमंडळ रे रूप में सेवा कर सकौ जिणरौ कर्तव्य अैडौ आध्यात्मिक बळिदान समरपित करणौ है जकौ यीशु मसीह रे मार्फत परमेसर नै चोखौ लागै। 6शास्त्र में लिख्यौ है:

“देखौ, म्हें सिय्योन में अेक खूणै रौ भाटौ राखूं हूं,
जकौ घणमोलौ है अर टाळ्योडौ है
इण माथे जकौ ई भरोसौ करैला उणने कदैई
लजखाणौ नीं पड़णौ पड़ेला।”

यशायाह 28:16

7थां विस्वासी लोगां सारू घणमोलौ है पण जका भरोसौ नीं करै वां सारू:

“वौ इज भाटौ जिणने कारीगरां नकार्यौ हौ
सगळां सू महताऊ खूणै रौ भाटौ बणायौ।”

भजन संहिता 118:22

8अर वौ बणायौ:

“अेक अैडौ भाटौ जिणसू लोगां नै ठबक लागै
अर अैडै अेक चाठ जिणसू लोगां नै ठोकर
लागै।”

यशायाह 8:14

लोग ठोकर खावै है, क्यूके वै परमेसर रे वचन री पाळणा नीं करै अर बस औ इज वारै सारू ठैराईज्यौ है।

9पण थे तौ टाळ्योडा लोग हौ, याजकां रौ अेक राज, अेक पवित्र प्रजा, अेक अैडौ नर-समूह जकौ परमेसर रौ आपरौ है, ताकि थे परमेसर रे अचरज जोग करमां री घोसणा कर सकौ। वौ परमेसर जकौ थाने घोर अंधारे सू सांतरे उजास में बुलायौ।

10 अेक समै हौ जद थे प्रजा नीं हा
पण अबै थे परमेसर री प्रजा हौ।
अेक समै हौ जद थे दया रा पात्र नीं हा
पण अबै थारे माथे परमेसर दया दरसायी है।

परमेसर सारू जीवौ

11हे व्हाला मित्रां, थे इण संसार में अणसैंधां रे रूप में हौ, म्हें थांसू अरज करूं हूं के वां सारीरिक इच्छावां सू अळघा रेवौ जकी थारी आतमा सू जूझती रेवै।

12विधरमियां रे बिचाळै थारी वैवार अैडौ ऊजळी बणायोडौ राखौ के भलांई वै अपराधियां रे रूप में थारी आलोचना करै पण थारे आछा करमां रे फळसरूप परमेसर रे आवण वाळै दिन वै परमेसर नै महिमा दिरावै।

अधिकारी री आग्या मानौ

13प्रभु सारू हरेक मानव अधिकारी री आधीन रैवौ।
 14राजा री आधीन रैवौ। वौ सै सूं ऊंचौ अधिकारी है।
 सासकां री आधीन रैवौ। वानै वौ कुकरमियां नै दंड
 देवण अर आछा करम करण वाळां री सरावणा सारू
 भेज्यौ है। 15क्यूकै परमेसर री आ इज इच्छा है कै थे थारै
 आछे करमां सूं मूरख लोगां री अग्यानी बातां नै चुप
 कराय सकौ। 16आजाद आदमी री भांत जीवौ पण
 उण आजादी नै भूँडे कामां री आड मत बणण दौ।
 परमेसर रा सेवकां ज्यूं जीवौ। 17सगळां रौ आव-आदर
 करौ। आपरै धरम भायां सूं प्रेम करौ। परमेसर सूं आदर
 री सागै डरौ। सासक रौ सन्मान करौ।

मसीह री जातना री दिस्टांट

18हे सेवकां, पूरै आदर री सागै आपरै स्वामियां री
 आधीन रैवौ। नीं फगत वारै जका आछा है अर दूजां
 सारू चिंता राखे बल्कै वारै पेटे ई जका करड़ा है।
 19क्यूकै जे कोई परमेसर री पेटे सावचेत रैवता थकां
 जातनावां सैवै अर अन्याय झेलै वौ सरावणजोग है।
 20पण जे माड़ा करमां री कारण थानै कूटीजै अर थे
 उणनै सैवौ हौ तौ इणमें सरावणा री कांई बात! पण जे
 थे थारै आछे करमां सारू सताईजौ तौ परमेसर सारू
 औ सरावणजोग काम है। 21परमेसर थानै इण सारू
 बुलाया है, क्यूकै मसीह ई आपां री सारू दुख उठाया
 है अर अँडौ कर'र आपां री सारू उदाहरण छोड्यौ है,
 ताकि आपां ई उणी री चरण-चिह्नां माथे चाल सकां।

22 “वौ कोई पाप नीं कर्यौ

अर ना ई उणरै मूँडे सूं कोई छळ री बात ई
 निकळी।”

यशायाह 53:9

23जद वौ अपमानित होयौ तद वौ किणी रौ अपमान
 नीं कर्यौ। जद वौ दुख झेल्या, वौ किणी नै धमकी
 नीं दी, बल्कै उण साचौ न्याय करणिया परमेसर री
 आगै अपणै आपनै अरपित कर दियौ। 24वौ क्रूस
 माथे आपरै डील में आपां री पापां नै ओढ लिया।
 ताकि आपणै पापां री पेटे आपां मर जावां अर जकौ
 कीं नेक है उण सारू आपां जीवां। औ उणरै वां घावां
 री कारण इज होयौ जकां सूं थे चंगा करीज्या हौ।
 25क्यूकै थे भेड़ां ज्यूं भटकता हा पण अबै थे थारै

अेवाडियै अर थारी आतमावां री रुखाळै कनै पाछा
 बावडग्या हौ।

धणी अर लुगाई

3¹ इणी भांत हे लुगायां, आप-आपरै धणियां री
 पेटे समरपित रैवौ। ताकि जे वां मांय सूं कोई
 परमेसर री वचन री पाळणा नीं करै तौ थारै पवित्र अर
 आदरजोग चाल-चलण नै देख'र बिना किणी बंतळ
 री इज आप-आपरी लुगायां री वैवार सूं जीतीज जावै।
 2थारौ साज-सिणगार दिखावटी नीं होवणौ चाईजै।
 3मतळब कै जकौ बाळां री वेणियां सजावण, सोनै
 रा गैणां-गांठां पेरण अर आछा-आछा गाभा-लत्तां सूं
 कर्यौ जावै, 4बल्कै थारौ सिणगार तौ थारै मन रौ
 मांयलौ आपौ होवणौ चाईजै जकौ कंवळौ अर सांत
 आतमा री अविणासी फूटरापै सूं लडालूम होवै अर
 परमेसर री दीठ में जकौ अमोलक होवै।

5क्यूकै बीत्योडै जुग री वां पवित्र लुगायां रौ,
 अपणै आपनै सजावण-संवारण रौ औ इज ढाळौ हौ,
 जिणां री आसावां परमेसर माथे टिक्योडै है। वै आपरै
 धणियां री आधीन बियां इज रैवती ही। 6जियां इब्राहीम
 री आधीन रैवण वाळी सारा जकी उणनै आपरौ धणी
 मानती ही। थे ई बिना किणी डर'र जे आछा करम करौ
 हौ तौ उणरी इज बेटी हौ।

7इयां ई हे धणी मिनखां, थे थारी लुगायां री सागै
 स्याणप सू रैवौ। वानै निबळी जाण'र वारौ आदर करौ।
 मिनखाजून री वरदान में थानै थारौ सह उत्तराधिकारी
 मानौ ताकि थारी प्रार्थनावां में अटकवा नीं आवै।

सतकरमां सारू दुख झेलजौ

8अंत में थां सगळां नै समान विचार, सहानुभूतिसील,
 आपरै बंधुवां सूं प्रेम करण वाळौ, दयालु अर कंवळै
 हिरदै रौ बणणौ चाईजै। 9अक बुराई रौ बदळौ दूजी
 बुराई सूं मत देवौ। या अपमान री बदळै अपमान मत
 करौ बल्कै बदळै में आसीस देवौ, क्यूकै परमेसर थानै
 अँडौ इज करण सारू बुलाया है। इणी सूं थानै परमेसर
 री आसीस रौ उत्तराधिकारी मिळसी। 10शास्त्र कैवै है:

“जकौ जीवण रौ आणंद उठावणौ चावै

जकौ समै री सदगत देखणौ चावै

उणनै चाईजै कै वौ कदैई ओछा बोल नीं बोलै।

वो आपरै होटां नै कपट-वाणी बोलण सू रोके
 11 उणनै चाईजै के जकौ भलौ नीं व्हे उणसूं मूंडौ
 फेरलै अर वां कामां नै नित करै, जका
 भलेरा होवै।

उणनै चाईजै के सांति पावण सारू खैचळ
 करै, उणनै चाईजै के वौ सांति रौ
 अनुसरण करै।

12 प्रभु री आख्यां वां माथै इज टिक्योड़ी है जका
 आछा है

प्रभु रा कान वारी प्रार्थनावां माथै लाग्योड़ा है,
 जका माड़ा करम करै।

प्रभु वांसूं हमेसा मूंडौ फेर्यौ राखै।”

भजन संहिता 34:12-16

13 जे थे उणनै इज करण सारू लालायित रैवौ जकौ
 आछौ है तो भलां थानै कुण हाण पुगाय सके है।

14 पण जे थानै भलै काम सारू दुख ई उठावणौ पड़ै
 तो थे धिन हौ। “इण वास्तै ना तो वारै किणी डर सूं
 डरपौ अर ना ई आकळ-बाकळ होवौ।” 15 आपरै मन
 में मसीह नै प्रभु रै रूप में आदर देवौ। थे सगळा जिण
 विस्वास नै राखौ हौ, उण बाबत जे कोई थांसूं पूछै तो
 उणनै उथळ्यौ देवण सारू हमेसा त्यार रैवौ। 16 पण औ
 नरमाई अर आदर रै सागै इज करौ। आपरौ हिरदै सुद्ध
 राखौ ताकि यीशु मसीह में थारै आछै आचरण री निंदा
 करण वाळा लोग थारौ अपमान करता थकां लजावै।

17 जे परमेसर री इच्छा आ इज है के थे दुख उठावौ
 तो आछा करम करता थकां दुख झेलौ, नीं के माड़ा
 करम करता थकां।

18 क्यूंके मसीह भी आपां रै पापां सारू
 दुख झेल्यौ है।

मतळब वौ जकौ निरदोस हौ

आपां पापियां सारू अेकर मरग्यौ

ताकि आपां नै परमेसर रै नैड़ा ले जावै।

सरिर रै भांय तो वौ मरग्यौ

पण आतमा रै भाव जीवाईज्यौ।

19 आतमा री स्थिति में इज वौ जाय'र जकी बंदी
 आतमावां ही, वानै संदेस दियौ। 20 जकी उण बगत
 परमेसर री आग्या नीं मानण वाळी ही। जद नूह री नाव

बणाईजै ही अर परमेसर धीरज रै सागै बाट जोवै हौ
 उण नाव में थोड़ा-सा, मतळब फगत आठ मिनख इज
 पाणी में डूबण सू बच्या हा। 21 औ पाणी उण बपतिस्मैरै
 उनमान है जिणसूं अबै थारौ उद्धार हुवै है। इणसूं डील
 रौ मैल छुडावणौ नीं, बल्के अेक सुद्ध मन-अंतस सारू
 परमेसर सूं विणती है। अबै तो बपतिस्मौ थानै यीशु
 मसीह रै पुनरुत्थान सूं बचावै। 22 वौ सुरग में परमेसर रै
 जीवणै बिराजै, अर अबै सुरगदूत, अधिकारी लोग अर
 सगळी सगतियां उणरै आधीन करीजगी है।

बदळ्योड़ौ जीवण

4¹ जद मसीह सारीरिक दुख झेल्यौ तो थे ई
 उणी मनगत नै शास्त्र रै रूप में धारण करौ,
 क्यूंके जकौ सारीरिक दुख झेलै, वौ पापां सूं छूटकौ
 पाय लेवै। 2 इण वास्तै वौ फेरूं मानवीय इच्छावां
 रौ अनुसरण नीं करै, बल्के परमेसर री इच्छा मुजब
 करम करता थकां, आपरै बाकी बच्योड़ै भौतिक
 जीवण नै समरपित कर देवै। 3 क्यूंके थे अबार ताई
 अबोध आदम्यां जियां विसय-भोगां, वासनावां,
 पियक्कड़णै, उणमाद सूं भरयोड़ा आमोद-परमोद,
 मधुपान उच्छबां अर घिरणा वाळी मूरती-पूजावां में
 धपाऊ समै बिताय चुक्या हौ।

4 अबै जद थे इण घिरणा वाळै रैण-सैण में वारौ
 सागौ नीं देवौ हौ, तो वानै अणंतौ अचरज होवै है।
 वै थारौ निंदा करै। 5 अबार जका जीवता है या मरग्या
 है, वानै आपरै वैवार रौ लेखौ-जोखौ उण मसीह नै
 देवणौ पड़सी जकौ वारौ न्याय करण वाळी है। 6 इण
 वास्तै वां विस्वासियां नै जका मरग्या है, सुभसंदेस रौ
 उपदेस दिरीज्यौ के सारीरिक रूप सूं भलाई वारौ न्याय
 मानवीय लेखै होवै पण आत्मिक रूप सूं वै परमेसर
 री आंकस में रैवै।

आछा प्रबंधकर्ता बणौ

7 वौ समै साव नैड़ी है जद सर्-कीं खतम व्हे जावैला।
 इण वास्तै स्याणा बणौ अर खुद माथै आंकस राखौ,
 जिणसूं के थानै प्रार्थना करण मांय मदद मिलै।
 8 अर सगळां सूं बडी बात आ है के अेक-दूजे रै
 पेटै लागोलग अपणायत बणायी राखौ, क्यूंके प्रेम
 सूं अणगिण पापां रौ निवारण होवै है। 9 बिना कीं
 कैयां-सुण्यां अेक-दूजे री आवभगत करौ। 10 जिण

किणी नै परमेसर कांनीं सूं जकौ ई वरदान मिळ्यौ है, उणने चाईजै कै परमेसर री मोकळी किरपा नै आळा प्रबंधकां जियां अेक-दूजै री सेवा सारू बरतौ। 11जकौ कोई प्रवचन करै, वौ इयां करै जियां जाणै परमेसर सूं मिळ्योड़ा वचनां नै इज सुणाय रैयौ है। जकौ कोई सेवा करै, वौ उण सगती रै सागै करै जकी परमेसर उणने देवै। इण सूं सगळीं बातां मांय यीशु रै मार्फत परमेसर री महिमा होवै। महिमा अर सामरथ नित-नितू उणी री है। आमीन!

मसीही रै रूप में दुख झेलजौ

12हे व्हाला मित्रां, थारै बीचली अर थानै परखण वाळी इण अगन-परीक्षा माथे इण भांत अचरज मत करजौ जियां कै थारै सागै कोई अणहोणी घटना घटती होवै, 13बल्कै आणंद मनावौ कै थे मसीही री जातनावां मांय पांती पड़वाय रैया हौ। ताकि जद उणरी महिमा प्रगट होवै तद थे ई आणंदित अर मगन होय सकौ। 14जे मसीह रै नांव माथे थे अपमानित होवौ तौ उण अपमान नै सैवौ, क्यूंकै थे मसीह रा अनुयायी हौ, थे धिन हौ, क्यूंकै परमेसर री महिमावान आतमा थारै मांय वासौ करै है। 15इण वास्ते थां मांय सूं कोई भी अेक हत्यारौ, चोर, कुकरमी कै दूजै रै काम में रोड़ा अटकावणियौ बण'र दुख मत उठाईजौ। 16पण जे वौ अेक मसीही होवण रै नातै दुख झेलै है तौ उणने लजखाणौ पड़ण री जरूरत कोनी, बल्कै उणने तौ परमेसर नै महिमा देवणी चाईजै कै वौ इण नांव नै धारण करै है। 17क्यूंकै परमेसर रै आपरै परिवार सूं इज सरू होय'र न्याय सरू होवण रौ बगत आय पूयौ है। अर जे औ आपां सूं इज सरू होवै तौ जकां परमेसर रै सुभसंदेसां री पाळणा नीं करी है, वारौ परिणाम कांई होवैला?

18 “जे अेक धारमिक मिनख रौ ई कल्याण होवणौ अबखौ है
तौ परमेसर विहूण अर पापियां रै सागै कांई
वेला बीतैला।” नीतिवचन 11:31

19तौ पछै जका परमेसर री इंडा मुजब दुख झेलै, वानै आळा करम करता थकां उण भरोसैमंद अर सिस्टी रा रचयिता नै आप-आपरी आतमावां सूप देवणी चाईजै।

परमेसर रौ जन-समूह

5¹अबै म्हें थारै बिचाळै बैठा बडेरा लोगां सूं अरज करूं हूं; म्हें जकौ खुद अेक बूढौ आदमी हूं अर मसीह जकी जातनावां झेली है, वारौ साखीधर हूं अर वा भावी महिमा जकी प्रगट होवण वाळी है, उणरौ सैभागी हूं। 2मारग बतावणियै परमेसर रौ जन-समूह थारौ देखरेख में है अर पारखी रै रूप में थे उणरी सेवा करौ हौ; किणी रै दबाव रै कारण नीं, बल्कै परमेसर री इंडा मुजब अेडौ करण री मनस्या रै कारण थे थारौ औ काम धन कै लोभ-लाळच में नीं बल्कै सेवा करण रै पेटे खुद रै उछाव सूं करौ हौ। 3जका थानै देखरेख सारू संपीज्या है, थे वारा करड़ा अर निरकुस सासक मत बणौ। बल्कै लोगां सारू अेक आदर्स बणौ। 4ताकि जद वौ प्रधान रुखाळी प्रगट होवै तौ थानै जीत रौ मोटौ मुगट मिळै, जिणरी सोभा कदैईं नीं घटे।

5इणी भांत हे जोध जवानां! थे थारै धरम रा बडेरां रै आंकस में रैवौ। थे अेक-दूजै रै पेटे अपणायत धारौ, क्यूंकै:

“परमेसर अभिमानियां रौ विरोध करै
पण दीन लोगां माथे हमेस किरपा करै।”

नीतिवचन 3:34

6इण वास्ते परमेसर रै महिमा वाळै हाथ रै हेठे खुद नै निवावौ। ताकि वौ औसर आयां थानै ऊंचा उठावै। 7थे थारौ सगळी चिंतावां उण माथे छोड दौ, क्यूंकै वौ थारै सारू चिंता करतौ रैवै।

8खुद माथे आंकस राखौ। सावचेत रैवौ। थारौ बैरी सैतान अेक गरजतै सिंघ जियां इन्नै-बिन्नै घूमतौ इण ताक में रैवै कै जकौ ई मिळै उणने फाड़ खावै। 9उणरौ विरोध करौ अर आपरै भरोसे माथे जम्या रैवौ, क्यूंकै थे तौ जाणौ इज हौ कै आखै संसार में थारा भाई-बैन अेडी'ज जातनावां झेल रैया है।

10पण सगळी किरपा रौ स्रोत परमेसर, जकौ थानै यीशु मसीह मांय अणंत महिमा रौ सैभागी बणण सारू बुलायौ है, थारै थोड़े बगत सारू जातनावां झेल्यां पछै खुद इज थानै थरपित करैला, सिमरध बणावैला अर थिरता बगसैला। 11उणरी सगती अणंत है। आमीन।

कागद रौ निवेडौ

12 म्हें थानै औ नेन्हौ'क कागद, सिलवानुस रै सैयोग सूँ जिणनै म्हें म्हारौ भरोसैमंद भाई मानूं थारी हूस बधावण सारू कै परमेसर री साची किरपा आ इज है, इण बात री साख भरण सारू लिख्यौ है। इण माथै इज टिक्योड़ा रैवौ।

13 बाबुल री कलीसिया जकी थारै जियां ई परमेसर कांनी सूँ टाळीजी है, थानै नमस्कार कैवै। मसीह में म्हारै बेटे मरकुस रौ ई थानै नमस्कार।
14 हेत भख्या वहाला लेय'र अेक-दूजै रौ सुआगत-सत्कार करौ।

थां सगळां नै, जका मसीह में हौ, सांति मिळै।